

BABIER EL
OLNGESEU ER

A T E L U N G A L E K

BABIER EL
OLNGESEU ER

A T E L U N G A L E K

Milluches er a
Ikelesia er a Jesus Kristo er a Uriul-klebesei el Santo
Salt Lake City, Utah

©2009 lokiu a Intellectual Reserve, Inc.
Urrekodel a rokui el klisiich
Milluches er a United States of America

Kengei er a English: 2/06
Kengei er a oidel: 2/06
Oidel a *Family Guidebook*
Palauan

Beldeklel

“A Telungalek: Chais el mo er a Beluulechad”	iv
Teletelel me a Moktek er a Telungalek	1
Osisechakl er a Ebangkelio er a Blai	5
Kutmokl a Ngerchelel a Telungalek	14
Osisechakl el mo er a re ngar er a Omerreder	18
Teletael er a Omengull er a Blai (Ikel Telungalek el nga er a Cheroid el Basio)	19
Ruoll me a Ngerachel er a Priesthood me a Klengeltengat	21
Ngeiul a Babier er a Ikelesia me a Skel a Tekoi el Kirel a Reksi er a Telungalek	30

“A Telungalek: Chais el mo er a Beluulechad”

Se er a 1995, ea First Presidency me a Chelchad er a Teruich me a Terung el Apostol a ultebedii a tekoi el kirel “A Telungalek: Chais el mo er a Beluulechad.” Tia el chais a mo chotii a klemarang el kirel a osisechakl me a omeruul el profet a mla omelekel el melekoi er ngii er a chelsel a reksi er a Ikelesia. Ng olab a tekoi el ngii a kmla meklou a belkul el kirel a klechad er a bekel telungalek. A rechad er a telungalek a kirir el mo mesuub er tia el klumech e mo oltirakl aike el medung er a chelsel.

“Kemam, el First Presidency me a Chelchad er a Teruich me a Terung el A postol er a Ikelesia er a Jesus Kristo er a Uriul-klebesei el Santo, a obang a cheledaol el tekoi e mchisii el kmo a chebechiil er a delongelel a sechal me a redil a meketmokl er a Dios me a telungalek a sel kmal ngar er a belngel e moktek er sel uldesuel a Ulemeob el kirel a diak a ulebengelel klengar el mo er a Rengelekel.

“A rokui el chad—sechal me a redil— a ulebeob el di uaia teletelel a Dios. A derstang er tia a mekreos el ngalek er a reng el sechal me a redil el ngelekel a Chedam me a Chedil er a Babeluades, me a, leuaisei, ea derstang er tir a sebecherir el mo ngmai a teletelel me a blekerdelel a Dios. Sel klaodengei er a chad el kmo ng sechal me a lechub eng redil a klou a belkul el kirel a klengar ruchei er tia el klengar, me a klengar er a beluulechad, me a klengar ruriul er tia el beluulechad me a moktek er ngii.

“Chelsel sel klengar ruchei er tial el klengar er a beluulechad, ea rengalek er a reng el sechal me a redil a milengull er a Dios el ngii a Diak a Ulebengelel el

Chedam e kilengei er a Uldesuel el ngii a Rengelekel a mo nguu a bedengir er a tech e mo kiei er tia el beluulechad e mesuub el merael el mo kliiud meng mo sebecherir el mo nguu a diak a ulebengelel klengar. Tia el luldesuel a Dios a kirel a deoureng a sobecheklui a deleuill er a telungalek meng mele-molem e ruriull er a kodall. A chedaol ruoll me a telbiil el ngar er a chelsel a templo a rullii meng mo sebechel a chad el lemuut el mo er a rengedel a Dios me a telungalek a lmuut el mo dmak el mo er a diak a ulebengelel.

“A kot el llach el ngiluu a Dios el msang a Adam me a Eva a sel techall el mo er tir el sebecherir el mo oungalek el obekel. Aki ouchais el kmo sel lechul a Dios el mo er a Rengelekel el mo omdois e omekeek er a beluulechad a kmal dirk mesisiich. Aki mele-molem el ouchais el kmo a Dios a mla kmu el kmo sel chedaol klisiich el lomeob er a rengalek a kirel di meketmokl er a delongelel a sechal me a redil, el tir a mla moterekokl el kaubuch.

“Aki ouchais el kmo a teletael er a klengar er tia el beluulechad a

mokdubech el lultuil er a dereder er a Dios. Aki smisichii el kmo a klengar a chedaol e kmal klou a belkul er sel diak a ulebengelel el uldesuel a Dios.

“A robekel a ngar er ngii a kmal chedaol el ngerchelir el kirir el kaubeltik el reng e kaukerreu me a dirrek el mo er a rengelekir. A rengalek a mo ngmai aike el rokui el lolab a Rubak (Psalms 127:3). A rechedam me a rechedil a ngar er ngii a chedaol el ngerchelir el lomekeroul er a rengelekir loba beltik el reng me a llemalt, e smiik aike el lousbech a bedengir er a reng, e mo olisechakl er tir el mo kaubeltik el reng e mo mesiou er a tang me a tang, e mo oltirakl a llechul a Dios e mo oltirakl a llach er a ike el beluu el le kiei er ngii. A robekel—me a rechedil me a rechedam—a mo mukerkeriil er a medal a Dios el kirel a oketmeklel aika el ngerachel.

“A telungalek a mechedaol er a Dios. A chebechiil er a delongelel a sechal me a redil a kmal klou a ultutelel er sel diak a ulebengelel el Uldesuel. A rengalek a ngar er ngii a lemeltir el me mechell er a chelsel a chebechiil, e mukeroul er a chedam me a chedil el tir a mui el oltirakl aike el telbiil er a chelsel a chebechiil. A deourenge er a chelsel a telungalek a sebechel mo er ngii alsekum a telungalek a ultuil er a Osischeklel a Rubak el Jesus Kristo. A ungil chebechiil me a telungalek a sebechel meketmokl e melemolem el ultuil er a osisechakl er a klaumerang, nglunguuch, ouchel a rengud er a kengtid e olengit a klausubes, klausubes, omengull, beltik el reng, klechu-

bechub, ureor, me a ungil e ngar er ngii a belkul el omilil. A uldesuel a Dios a kmo, a rechedam a oungerachel er a telungalek lokiu a beltik el reng me a llemalt e ngerchelir el smiik e kutmokl aike el ousbech er a klechad me a ulekereu lousbech a telungalek. A kot el ngerchelir a rechedil a omekerreu e omekeroul er a rengelekir. Chelsel aikaikid el chedaol ngerachel, ea rechedam me a rechedil a kirir el kaukledem e kaingeseu el tabesul a ngerchelir. A lebo er ngii a tekoi er a chelitechut, kodall, malechub eng kuk di ngodech el teletael, eng kirel kuk mo mengodech a teletele aika el ngerachel. A re kauchad el chad a dirrek el kirir el kaingeseu.

“Aki omeklatk er tirke el chad el tir a tomellii sel telbiil er a llach er a tekoi er a deleboes, el tir a melemall e omekringel e mengerusii er a rebecherir me a rengelekir, malechub e te diak el longetmokl aike el ngerchelir er a telungalek a mo dechor e mo mukerkeriil er a medal a Dios er a ta er a klebesei. Osisiu, ea ki omeklatk el kmo a terudel a telungalek a mo uchul ea derstang el chad, me a basio, me a beluu a mo chuarm er a ringel me a kerior el ngii a mla medung er a rechuodel me a rebeches el profet.

“Aki omekedong er a rokui el bekongerachel el chad er a beluu me a remengeteklel a kabelment er a ngii dil ker me bo lolisiich aika el tekoi me a teletael el ngii a mla meketmokl el mo omehelieu e melisiich er a telungalek el ngii a kot el klou a ultutelel er a beluu” (*Ensign*, November 1995, 102).

Teletelel me a Moktek er a Telungalek



Teletelel

A telungalek a chedaol er a chelsel a Ikelesia er a Jesus Kristo er a Uriul-
klebesei el Santo e kot el klou a belkul
er chelechal taem me a diak a uleben-
gelel. A Dios a mla kutmokl a telun-
galek el ngii a mo uchul a deouren-
g el mo er a Rengelekel, el mesterir a



techall el mo suub a merang el osise-
chakl er a chelsel a ungil basio, e kut-
mekelterir el kirel a diak a ulebengelel
klengar.

A blai a kot el lungil el basio el kirel
osisechakl, omesuub, me a otireklel
a suobel me a osisechakl er a ikelesia.
Tiaikid a basio el derstang el chad
a mesuub el losiik a kelir, me a bilir,
me a omderengir, me a kuk di bebil
er a usbechellir. A chedam me a
chedil, el tir a tabesul a ngerchelir,
a kirir el olngeseu er a rebekel chad
er a telungalek:

- Osiik er a klemerang e mo er ngii
a klaumerang er tir er a Dios.
- Mo ouuchel a rengirir er a kengterir,
e mo metecholb el kirel a ngbetel a
kengterir, e mo chad er a Ikelesia er

a Jesus Kristo er a Uriul-klebesei el Santo, e mo nguua a Chedaol Reng.

- Mo oltirakl a llechul a Dios, e mo blak a rengrir el mesuub a Chedaol llechukl, e mo blechoel meluluuch er a bekel sils, e mo mesiou er a tang me a tang.
- Mo omerk er a ebangkelio el mo er a rebebil er a rechad
- Mo ngmai a ruoll er a templo el kirel e mo bechil a chad el ngii a klikiid e melemalt er a chesel a templo el kirel a diak a ulebengelel, mo kutmeklii a ungil blai el kirel a telungalek, e mo olngeseu er a telungalek lokuu a beltik el reng e dirrek el mo chuarm el kirel a telungalek.



• Mo

osiik a tekoi el kirir tirke el mla mad el chedad me a rebeldeked e mo meruul a ruoll er a templo el kirir.



- Mo smiik aike el rokui el lousebch a bedenged el kirel a tekingel a Dios, delongeled me a rebebil er a rechad, bedenged er a tech, me a rengud me a uldesued.

A chedam a btelul a telungalek e oungerachel el olisechakl er a rengalek e smiik aike lousbech a telungalek er a klengar er tir. A melemalt e klikiid el chedam er a Ikelesia a ngar er ngii a techellel el mo obang a priesthood, el ngii a klisiich me a ngerachel el meruul a urerel a Dios. Ngokiu tiaikid el klisiich me a ngerachel, ea chedam a mo uaiia lorreder er a priesthood er a telungalek er ngii. Ngii a omekrael er a telungalek er ngii el kirel a oketmeklir el lemuut el mo er a rengedel a Demad er a Babeluades. A bechil a kot el klou a belkul el kldemel, e chedal, e omekrael er ngii. A robekel a kirir el chadecheduch el kirel a rokui el tekoi el ngii a ngar er ngii a bo el rellii er a telungalek.

A chedam a kirel smiik aike el lousbech a telungalek er ngii el kirel a tekingel a Dios. Ng kirel el mo mesang el kmo a telungalek er ngii a mosisechakl a llechul me a osishecklel a Jesus Kristo e kirel me er sel tkul er bab el sebechel el omeksemeriar e olngeseu er tir el mo mengull e oltirakl a llechul a Rubak.

A chedam el obang a priesthood a sebechel el omekngeltengat er a rechad er a telungalek er ngii e smiik aike el lousbech el kirel a tekingel a Dios. Ngultuil er a ngerachel er sel priesthood lobang e *ultuil er a kengei er a chad el oungerachel er a priesthood*, ea chedam a sebechel:

1. Omngakl e omekngeltengat er a rengalek.
2. Melecholb er a rengalek (me a rebebil)
3. Mengedaol er a rengalek (me a rebebil) el mo chad er a Ikelesia e mo mesterir a Chedaol Reng.
4. Omsang a priesthood a rengelekel sechal (me a rebebil) e mengedaol er tir el mo er a obis er a priesthood.
5. Omekngeltengat e merous er a sakrament.
6. Olterekokl a debull

Ng diak a belkul el lolai er a kengei er a ungerachel er a priesthood, e le chedam el obang a Priesthood er a Melkisedek a sebechel el chemedolii a cheluch a omekngeltengat er a telungalek er ngii me a rebebil er a rechad alsekum te smecher e dirrek el sebechel lomekn-geltengat er tir alsekum eng mo kirel. (Mesa llel a babier 18–25 er tia el babier el lolngeseu el kirel omsodel a oketmeklel a chedaol ruoll me a klengeltengat er a priesthood.

A chedam a kirel mo mesang el kmo a telungalek er ngii a blechoel el meruul aikakid el kldei el tekoi:

1. Oketmekle a derstang el chad me a rechad er a telungalek el kirel a lousbech a bedenged me dirrek el tekingel a Dios.
2. Mo omerk er a ebangelio.
3. Reksi er a telungalek me a chedaol ruoll er a templo el kirir a re dirk ngar me a re mla mad.

A chedil a kirel el chedal e kldemel e omekrael er a bechil. Ng kirel lolngeseu er a bechil el olisechakl er a rengelekir a llechul a Dios. Alsekun eng diak a chedam er a blai, ea chedil a btelul a telungalek.

A chedam me a chedil a kirir el di mo tang a moktek er tir. Sel moktek er tir a kirir el kutmekelterir a rokui el chad er a telungalek meng mo sebecherir el lemuut el mo er a Demad er a Babeluades. Ng kirir el di mo tang e tmak loureor el kirel tia el moktek. A Rubak a mla kutmeklii a Ikelesia el olngeseu er a rechedam me a rech-edil el olisechakl e omecheliu er a telungalek er tir.

Sel sekum ea rengalek a mei er a telungalek, ea rechedam me a rechedil a kirir el mo oubeltik el reng el mo er tir, e olisechakl er tir a klemerang er a ebangelio, e mo okesiu er a ungil e melemalt el klechad. A rengalek a kirir el mo mesuub e mo oltirakl a llechul a Dios. Ng kirir el mo mengull e olngesenges er a redemerir me a rederir.

A klisichel a Ikelesia a ultuil er a telungalek me a derstang el chad el tir a oltirakl er a ebangelio er a Jesus Kristo. A klungel a klengeltengat er a ebangelio el bo lolchesuar a telungalek a kmal di ultuil er a chedam me a chedil er a ike el ngerchelir er a chelsel a telungalek. A Ikelesia a kmal diak el ruul a prokura-ram malechub eng ngerachel el msang a chedam me a chedil el ngii a kmal mo meringel er tir malechub e bo el rulterir el mo mengoit aika el kmal meklou a belkul el ngerachel.

Moktek

Ngultuil er sel beltkil a rengul a Demad er a Babeluades, e Ngii a soal kid a bo dolemolem el ngar el uai Ngii. Ng mo olngeseu er kid, meng mla meskid a uldaso el kired el oltirakl er ngii lultuil er a klemerang el llach. Tirke el mo mesuub er tia el luldaso e mo blak a rengir el oltirakl er ngii a sebecherir el ta er a klebesei e te mo uaia Demad er a Babeluades e sebecherir el mo semeriar er a klengar el Ngii a kiei er ngii.

A tebedechel tia el uldaso a kid a tuo-bed er a babeluades el mei er tia el beluulechad. Me kede nguu a bed-

enged er a tech, e mesuub lultuil er a ike el tekoi el duubech el mei er kid, e mo meketeklii el kmo kid a klikiid el lemuut el mo er a rengedel a Dios. Kid a mo meketeklii el kmo kede klikiid sel de mimokl el melilt el mo oltirakl a Llechul. (Mesa Abraham 3:23–25; 2 Nephi 2:27.)

Sel mo ngosukid el kutmeklid el lemuut el mo kiei el obengkel, ea Demad er a Babeluades a mla ngoikid el mo er a chesel a telungalek. Ngultuil er a chedaol ruoll me a telbiil, ea re telungalek er kid a sebecherir el mo tmak el mo er a diak a ulebengelel.

Osischekl el a ebangkelio er a Blai



Osischakl el mo er a Rengalek lobang a Ungil Blekeradel me a Beltik el Reng.

A Rubak a mla kmu er a rechedam me a rechedil me te olisechakl er a ebangkelio el mo er a rengelekir. Ngii a dilu el kmo:

“Alsekum ea rechedam me a rechedil a ngar er ngii a rengelekir er a Zion, e diak el olisechakl er tir el mo medengei a osisechakl er a mo ouuchel a rengud er a kengtid, klaumerang er a Kristo, el Nglelekel a ngar el Dios, me a techolb e chelid me a sengk er a chedaol reng loku omor er a chim sel bo el eiai a rekrir, ea klengit a mo er a rechedam me a rechedil.

“Tiang a mo llach el mo er a rokui el chad el ngar er a Zion, me a bekel stake er a Zion.

“Ea rengelekir a mo nguu a techolb e chelid el kirel a ngbetel a kengterir sel bo el eiai a rekrir, e mo nguu a omor er a chim.

“Ea rechedam me a rechedil a dirrek el mo olisechakl er a rengelekir el meluluuch, e meruul a llemalt er a medal a Rubak” (Mesang a D&C 68: 25–28).

A rechedam me a rechedil a kirir el olisechakl el obang a ungil blekeradel me a beltik el reng, el mo melbedebek a tekingel a Aposto Paulus el kmo” momkeroul [er a rengalek] er a teletelel me a soal a Rubak” (Efesus 6:4).

Omesuub er a Chedaol Llechukl er a Telungalek

Kid a sebeded el mo uايا Demad er a Babeluades e mo semeriar er sel teletelel a klengar el Ngii a kiei er ngii sel doltirakl a llach el kirel tiaikid el klengeltengat (mesa D&C 130:20–21). A uchei er abo doltirakl aika el llach, eng kired el mo medengei el kmo aika ngerang el llach. “Ng diak el sebedel a chad el mo suobel a lak a klaodengei er ngii” (D&C 131:6).

A Jesus Kristo a merreder er kid e meskid a llach. Ngii a medengelii a rael me a llach el kired el oltirakl, e Ngii a mla olengit er a derstang er kid el mo oltirakl er Ngii. Ngii a mla kmu el kmo, “Ngak a rael, e klemerang, e klengar: ng diak a chad el mei er a Chedam, a lak loku ngak” (Johanes 14:6). Sel bo de uايا Demad er a Babeluades e deluut el mo kiei Lobengkel, eng kired el mo mesuub a osischeklel a Jesus e mo oltirakl. Kid a olab a chedaol llechukl el olngeseu er kid el mesuub er a klengar, osischeklel, me a llechul a Jeus Kristo.

Aike el leuang el babier el Ikelesia a mla kongei el kmo ng chedaol el llechukl a Biblia, Babier er a Mormon, me a Osisechakl me a Telbiil, Meringelchad el Ngisel a Chesiuch. Aikang a smaod a llach er a ebangkelio me a teletael el dohang el uايا lolkael er a uldaso, omeruul, me a osisechakl. Aikang a ngosukid el mesuub er a klengar me a osischeklel a Jesus Kristo e meskid a okesiu er a rechad el tir a ml er ngii a klaumerang er tir er a Dios e ultirakl a Llechul.

A Jesus a mla olisechakl er kid el mo osiik e mesuub a chedaol llechukl (mesa Johanes 5:39; 3 Nephi 23:1; D&C 88:118).

A telungalek a kirir el dmak e blechoel el mesuub a chedaol llechukl el mo mesuub e oltirakl a osischeklel a Rubak. A rechadam me a rechedil a kirir el blechoel el mengidb er a telungalek er tir el mo menguiiu e mesaod a chedaol llechukl. A rebekel chad er a telungalek el sebederir el menguiiu a kirel mp ngar er ngii a techelir el menguiiu a chedaol llechukl.



A ta er a rechad er a telungalek a sebedel meluluuch er a uchei er a omesuub er a chedaol llechukl e olengit er a Chedam er a Babeluades me lomekngeltengat er a derstang el chad el mo medengei aika el longuiiu e mo er ngii a klaumerang er tir er ngii. A telungalek a dirrek el sebederir el mo dmak e meluluuch ruriul er a omen-guiiu el chedaol llechukl.

Sel sekum a telungalek a menguiiu e melbedebek a chedaol llechukl, e tir a mo sorir el mo uايا Osobel e mo metik er a klou el deoung me a budech er a klengar er tir.

Nglunguuch er Derstang el Chad me a dirrek el Telungalek

A derstang er kid a kirel el mesuub el mo mengedecheduch er a Demad er a Babeluades loki u a nglunguuch. Ngii a kmal betik a rengul er kid e soal a dongedecheduch er Ngii. Ngii a soal a doureng a sulel el kirel a klengeltengat el blal beskid e olengit a ngeso me a uldaso er ngii. Ngii a kmal mo ngo-sukid alsekum kid a olengit er ngii. Oumesingd el nglunguuch a medung el tellatel a btelud e blutek a medad sel doutubaruach, dengchokl, me a lechub e kede dechor.

Ng kired el mo medengei a kleuang el meklou a belkul el osisechakl sel doluluuch:

1. Kede omuchel a nglunguched el mengedecheduch el mo er a Demad er a Babeluades: "Demmam el ngar er a Babeluades . . ."
2. Kede oureng a sulel a Demad er a Babeluades el kirel a tekoi el Ngii a meskid: "Aki oureng a Sulem . . ."
3. Kede olengit er ngii aike el dousbech: "Aki olengit er Kau . . ."
4. Kede mo osmerii a nglunguched el obang a ngklel a Osobel: "Lobang a ngklel a Jesus Kristo, amen."

A nglunguched a diak el sal kirel el oltirakl aika el leuang el tekoi, eng di sel le ngar er a uldesued eng ngo-sukid el mesuub el mo meluluuch. Ng kired el blechoel el omuchel e mengesimer a nglunguched loba kot me a ongeuang el teletelel eng di aike

el de dung er a delongelel a kmal di ultuil er a ulsbechellel er kid. A lebe-bil er a taem eng soad el kemanget el meluluuch el oureng a sulel a Demad er a Babeluades. Ea kuk lebebil er a taem eng soad el kuk di meluluuch el olengit a ngeso er Ngii.



Nglunguuch er a Derstang el Chad

A derstang el chad a kirir el meluluuch el kesengil eng tang er a tutau me a lekebesebngei. A rechedam me a rechedil a kirir el olisechakl er a rengelekir el mo di tir el meluluuch sel le kot el mo meduch el mengedecheduch. A rechedam me a rechedil a kirir el olisechakl er a rengelekir el meluluuch el mo outubaruach lobengterir e omelekl a tekingir. Ng diak el meketeket ea ren-galek a di mo tir el meluluuch.

Nglunguuch er a Telungalek

A rebekel telungalek a kirel mo ngar er ngii a nglunguuch er a telungalek er a bekel sils. A chimol telungalek a mo outubaruach, ea btelul a telungalek a dulii a nglunguuch malechub eng

olengit er a ta er a chad meng mo dului. A rebekel chad a kirel ngar er ngii a techellir el mo meluluuch. A remekekere el ngalek meng sebecherir el mo meluluuch el lultuil er a ngeseo er a chedam me a chedil. A nglunguuch er a telungalek a kmal lungil el techall el dolisechakl er a rengalek er a teletelel a nglunguuch e dirrek el olisechakl a osisechakl el rua klaumerang er a Dios, klengariou el reng, me a beltik el reng,

mesuub el mo oureng a sulel a Dios el kirel a kelir e dirrek el olengit er Ngii me bo lomekngeltengat er uchei er a longang. A derstang el chad, luldumukl er ngii a rengalek, a kirir el kaukotai el olengit a klengeltengat. Sel doluluuch el olengit a klengeltengat er a keled eng ngosuterir a rechedam me a rechedil me a rengalek el mo mesuub el mo mui er a omereng el saul el mo er a Demad er a Babeluades.



Tokubets el Nglunguuch

A rechedam me a rechedil a kirir el olisechakl er a rengelekir el kmo a Dios a kmal di kltmokl el orrenge nglunguuched. Ongingil a blechoel nglunguuch er a derstang el chad me a telungalek, eng dirrek el sebecherir el meluluuch er a ngii dil mitil a taem a lousbech a tokubets el ngeso malechub eng sorir el oureng a saul.

Klengeltengat el mo er a Kall

A rechedam me a rechedil a kirir el mo omes me a rechad er a telungalek a



Ongdibel er a Telungalek

A ongdibel er a telungalek a mo er a rokui el chad, luldumukl er a robekel, rechedam me a rechedil el ngar er ngii a rengelekir, mesobil el chedam me a chedil e oungalek, me a rechedam me a rechedil el diak loungalek, me a remesobil el mekekerei el chad el dmak el ngar er a ongdibel, me tirke el di tir el tang el kiei me a lechub e te dmak el kiei lobengkel a ta er a rechad. A rokui el chad, er a ngii dil teletael, a mo ngmai a klengeltengat sel loruul er a ongdibel er a telungalek. A Ikelesia a mla cheklii sel kebesengei er a kot lureor er a rokui el tekoii meng sebechel a telungalek el mo dmak er a ongdibel er a telungalek.



A First Presidency a mla kmu el kmo: "Ko mo ngmai a meklou el klengel-tengat alsekum e ko mo oltirakl er a tekingel a Rubak el mo blechoel el ngar er ngii a ongdibel er a telungalek er kemiu. Aki kmal meluluuch me a rechedam me a rechedil er a Ikelesia bol kengei er a ngerchelir el mo olisechakl e bo el okesiu er a osisechakl er a ikelesia el mo er a rengelekir. A Dios bo el omekngeltengat er kemiu me bol blak a rengmiu er tia el kmal klou el ngerachel" ("Klumech er a First Presidency," *Family Home Evening Resource Book* [1983], iv).

Ngii el btelul a telungalek er ngii, ea chedam a oungerachel er a ongdibel er a telungalek. Alsekum eng dibus a chedam, ea chedil a oungerachel. A rechedam me a rechedil a ngiltii a ta er a chad el mo mengetakl er tia el ongdibel er a telungalek. Tir a olisechakl er a suobel me a lechub e te ngiltii a chad el mla mo klou el mo olisechakl er ngii. A rebekel chad el mla mo meklou a kirir el mo olngeseu. A remekekerei el ngalek a sebecherir el olngeseu el oungerachel er a chelitakl, menguii a chedaol llechukl, onger a ker, orreked a siasing, merous a kall, e meluluuch.

Tiakid a sebechel el mo ko er a teletelel:

- Nglunguuch er a uchehel (chad er a telungalek)
- Belkul a tekoi me a lechub eng omenguii el chedaol llechukl (chad er a telungalek)
- Suobel (chedam, chedil, me a lechub eng klou el ngalek)
- Klekool (oungerachel er ngii a ta er a chad er a telungalek ea rokui el chad a ousekool)
- Chelitakl el mo mengesimer (tia el telungalek)
- Nglunguuch el mo mengesimer (chad er a telungalek)
- Kall

A telungalek a sebechel el meruul er a ongdibel er ngii el ousbech a kakerous el teletael. Ngii dil klekool el ngoseuir a telungalek el mo dmak, e smisichii a beltik el reng er tir, ngosuterir el mo kmeed er a Chedam er a Babeluades, e omeksemeriar er tir el mo kiei er a klickid e ungil klengar a sebechel el ongdibel er a telungalek. A okesiu er a ikaikid el lomeruul me a klekool a rua omenguii el chedaol llechukl, mesaod er a ebangelio, kauchais a klaumerang, tekoi er a omesiu el mo er a rebebil er a rechad, dmak el mengitakl, mo pikenik, ousekool er a klokollel a telungalek, me a omilil er a oreomel me a ked. A rokui el ongdibel er a telungalek a kirel di uldimukl er a nglunguuch.

A suobel er a ongdibel er a telungalek a sebechel kirel a chedaol llechukl;

tekingir a reprofet er chelechal taem, er a ikel cheldechederir er a meklou el ongdibel; me a kuk di tekoi el mla duubech el mo er a chad me a klaumerang. Betok el suobel a kirel mo mesaod er a cherellel, klengar er ngii, osischeklel, me aTngakireng er a Osobel. *Gospel Principles, Gospel Fundamentals, True to the Faith, For the Strength of Youth*, me a babier er a Ikelesia el mesaod a betok el tekoi me a suobel el ngii a sebeched el ousbech er a ongdibel er a telungalek.

Aikakid a bebil er a sebechel mo suobel er a ongdibel er a telungalek:

- Sel uldasou el kirel a diak a ulebengelel klengar
- Klengar me a osischeklel a Jesus
- Ouuchel a rengud er a kengtid
- Nglunguuch
- Olsengerenger
- Llach el kirel a Omelisiich er a Bedenged
- Llechul a Rubak er a omengikiid er a bedenged er a tekoi er a deleboes
- Belkul a sakrament
- Ongeltacher
- Omereng el saul
- Melekoi a klemerang
- Odanges el mo er a Dios me a omengull el mo er a Blebelel
- Omengetmekled el kirel a techolb e chelid, mechedaol el mo er a priestood, me a chebechiil
- Omengetmekled el mo soiseb er a templo

- Omenguiiu el chedaol llechukl
- Kullii a Chedaol Sils er a Rubak
- Osubes er a rechad
- Mo er ngii a klaumerang er kid e mo ochotii
- Mo omerk er a ebangelio el mo er a rebebil er a rechad
- Mo mengetmokl a reksi er a rechedad
- Mo medengeli e kongei er a kodall
- Mo mesaod a mondai me a uldikel er a telungalek
- Mo meduch el orrurt a udoud er a telungalek
- Klaingeseu er a ureor er a telungalek
- Mo dmeu a rengud e semeriar a chelitakl

Chedaol sils me a kuk di Tokubets el Sils

A chedaol sils me a kuk di tokubets el sils, el uaia rua Kurismas; Easter, sel sils el mlo luut a priesthood; meklou el ongdibel; omerollel a chad er a telungalek el mo er a mision; cheroll, techolb e chelid, malechub eng oterkekkel a ta er a chad er a telungalek, a kmal sebechel ungil techall el doli-sechakl a klemerang er a ikelesia.

Ongeltacher me a kuk di bebil er a Uldars

A Rubak a mla kmu er a Rechedal el mo oltirakl er a llach er a ongeltacher a mo klikiid el kirel a klengeltengat er ngii (mesa Malakai 3:8–11).



A kmal ungil taem el rechedam me a rechedil a mo olisechakl er a llach er a ongeltacher a sel tir a harau a ongeltacher er tir. A rengalek a kmal lomes e omtab a loruul a rechad er a blirir. A rengalek el mo er ngii a uudir a kirir el harau a ongeltacher er tir. A derstang el ngalek a kirir el ngar er ngii a kldei el kakerous el blil a uudir: a chimong a mo er a ongeltacher, a chimong a kirel a mision, ea chimong a ike el ousbech el udoud. Sel tal bo er ngii a uudir, eng kirir el me a kot el mesuub el harau er a teruich el basent el mo ongeltacher, e lochang a bebil er sel kirel a mision, ea ikel medechel a llechang er sel lousbech er ngii.

Sel sekum a rengalek a harau a ongeltacher, ea rechedam me a rechedil a kirir el osisckelsterir el meluches er a babier er a ongeltacher, e nguu el sukur er a huto ngii me a udoud, e nguu me a lechub e te odureklii el mo er a ta er a chad el ngar er a klebisob me a lechub eng ngar er a omerreder er a branch. A telungalek el kiei er a cheroid el basio a kirir el nguu a ongeltacher er tir el msang a chad el oungerachel er a priesthood el ngii a mla moterekokl el melai.

Cheldechoduch er a Temel a Blengur

Sel temel a blengur a ta er a kmal ungil taem el ngar er ngii a cheldechoduch el kirel a osisechakl er a ikelesia. A remekereki el ngalek a sorir el oker e onger a ker er a tekoi er a ikelesia. Alsekum eng diak lodengelii a nger, ea chedam malechub eng chedil a sebecherir el mesterir a nger e osisckelsterir er a tekoi er a ikelesia. Ng diak el rokui el temel a blengur e di mosaod a tekoi er a ikelesia, eng di a uaikaikid el teletael a le ngar er ngii el lerung malechub eng edei el taem er a tal sandei eng sebechel ngoseuir a telungalek el mesuub a osisechakl er a ikelesia.

Cheldechoduch el chelid ruchei er a Cheliuau

A rengalek a kmal sorir sel dongedechoduch el chelid el mo er tir ruchei er a cheliuau, el dirrek el kmal meskid a ungil techall el mo olisechakl a osisechakl er a ikelesia sel donguiu e douchais a cheledechoduch el chelid er a chesl a chedaol llechukl, kuk di bebil er a babier er a Ikelesia, me a lechub eng kuk tekoi el mla duubech el mer kid. Cheldechoduch el chelid el kirel a meleko i a klemerang, omerous, me a ungil blekeradel a dirrek el sebechel osisechakl a meklou a belkul el osisechakl er a ikelesia.

Dmak el Oureor

Ng kmal betok a techall el duubech el kirel a osisckelkl a suobel er a ikelesia sel sekum a telungalek a dmak el

oureor. Sel dongetmokl er a blai malechub eng mekesong me a de ngar er a sers, eng uaisei, el rechedam me a rechedil a kirir el mo kerekikl el kirel a techall el sebecherir el mo olisechakl a suobel er a ikelesia. A ngalek a blechoel loker a ker. A rechedam me a rechedil a kirir el blechoel el mesterir a beot el nger. Tekoi el uaia "Kau a kmal meduch el oureor. A kmal medengei el kmo a Chedam er a Babeluades a kmal dmeu a rengul kirem" malechub "Kamesang tia el klebokel el iiabed el blal rellii a Chedam er a Babeluades" aikang a sebechel mesterir a rengalek a reng er a omereng el saul el mo er a Demad er a Babeluades me sel meral klaodengei el kmo Ngii a merang.



Omellach er a chesl a Telungalek

A rechedam me a rechedil a sebecherir el omekedong er a telungalek el mo kldibel e chadeduch. A telungalek a sebecherir el ousbech er tia el taem er a cheldechuch el mo smaod aike el sorir el mo meruul el telungalek, sumechokl a mondai er a telungalek, mesaod a tekoi er a udoud, kmung aike el sorir el mo meruul, olngeseu e melisiich er a tang me a tang, kau-

chais a klaumerang er tir, e meluluuch el kirel a tang me a tang. Tia el taem er a cheldechuch a sebechel mo er ngii se el bo el usbechall. A rechedam me a rechedil a sebecherir el mo chadeduch el telungalek sel Sandei malechub eng obengkel sel ongdibel er a telungalek. A omengull el kirel a uldesuel me a rengul a tang me a tang a kmal klou a belkul el kirel a mo klungiolel tia el cheldechuch er a chesl a telungalek.



Berrotel el Cheldechuch

Betok el rechedam me a rechedil a mla metik el kmo sel blechoel, el ngar er ngii a berrotel el cheldechuch eng ngoseuir a ngalek el kmal mo mesisiich a delongeel ngii me a chedam me a chedil, e omeksemeriar er tir, e olisechakl er tir a suobel er a ikelesia. A uaikaikid el cheldechuch a sebechel el kmal ungil kltmokl me a lak e kirel mo mekdekudem.

A rechedam me a rechedil a kirir el mo ochotii sel klaumerang er tir el mo er a ngalek, ea ngalek a kirel mo e rngii a techellel el ochotii a rengul me a uldesuel el kirel a ngii dil ngerang, mondai, me a lechub eng tekoi el mla duubech el mo er ngii. A recham me



a rechedil a kirir el kmal mo ungil el orrenge e mo ungil omtab er a uldesuel me a mondai er a ngalek. A chedam me a chedil a sebecherir el mo meluluuch el obengkel a ngalek. Aike el mondai el duubech er a chelsel tia le cheldech duch el ngii a uldimukl er ngii a ta er a chad er a telungalek a kirel mo soadel er a sel ta er a ongdibel er a telungalek.

Omilil er a Telungalek

A rechedam me a rechedil a kirir el mo kutmokl a temir meng mo sebecherir el dmak el telungalek el meruul a kmo ngerang. A pikenik, omilil er a klebesei er a telungalek, omeruul er a telungalek, ureor er a chelsel a blai me a mekesong, omengedub, omilil er a oreomel, me a ungil osengel a movie me a lmuut el bebil a sebechel a telungalek el dmak el meruul.

A telungalek el dmak el milil e meruul a ngerang a mo melchesuar a klou el beltik el reng me a kltalreng er a delongelir. A rengalek a mo semeriar el mo orrenge a tekingir a rechedam me a rechedil e mo oltirakl er tir sel ungil a deleuill er tir. Ea rechedam mea rechedil a mo sebecherir el mo ungil el olisechakl a suobel er a ikelesia.



Mo Kutmokl a Ngerchelel a Telungalek



Sel moktek er a Ikelesia er a Rubak a mo ngosuterir a rokui el chad el mei er a Kristo. A telungalek a sebecel el olngeseu el kutmeklii tia el moktek sel:

1. Di tir el osiik aike lousbech er a tekingel a Dios me a lousbech a bedengir e dirrek el mo olngeseu er a rebebil er a rechad.
2. Mo ouchais er a ebangelio el mo er a rebebil er a rechad
3. Mo mesang el kmo a telungalek a mo ngmai a ruoll er a templo e mo olngeseu er a rebebil er a rechad el mo ngmai ngii el klengeltengat el mo er tirkel mla mad el chederir.

Aike el Dousbech el Tekingel a Dios me a Lousbech a Bedenged

Usbechelled er a tekingel a Dios

Tia el mlo merek el bliongel er tia el babier el olngeseu, "Osischeklel a Suobel er a Ikelesia er a Blai," a ngar er ngii a tekoi er a chelsel el ngoseuir a telungalek el mo smiik aike el ousbech el tekingel a Dios.

Aike el Ousbech a Bedenged

A telungalek a kirir el di motir el mesiou a klechad er tir meng sebecerir el mo meduch el osiik aike el ousbech a bedengir e dirrek el mo olngeseu er a rebebil er a rechad. A telungalek a kirel el mo meduch el di

ngii el mesiou er ngii, el lutiul er a klemeriar reng er tir er a ureor. A ureor a uluiul er a bedenged, uldesued, me a rengud er a tekingel a Dios. Tiang a ta er a uchul eng sebeched el kutmokl a kmo ngerang el tekoi, me a dirrek el deourenge el mei er kid, me a reng er a blekebek, e dirrek el merael el mo ungil besud. A rechedam me a rechedil a kirir el mesuub el di mo tir e dirrek el olisechakl er a rengelekir el mo meruul a osisiu el omeruul. Sel di bol tir eng ngosuterir el mo olngeseu er a rebebil er a rechad.

A rechedam a ngerchelir el osiik a lousbech a telungalek e dirrek el lomecheliu er a telungalek. A rechedil a kmal ngerchelir el lomekeroul er a rengalek. A rechedam me a rechedil a kirir el mo mesang me a blai a klmtokl e klikiid, me a kall a ngar er ngii, me a bail, me a tekoi er a ukeruul me a osengel a toktang er a uingel, me a techall er a skuul, me a osisechakl er a tekoi er a kerremelel a udoud, me a dirrek, a lsebechel, a okurulel a bebil er a kelir. A rechedam me a rechedil a kirir el mo olisechakl er a rengelekir el mo mengetmokl a kall el kirel a uriul el usbechellel.

A rechedam me a rechedil a kirir el mo blak a rengrir el oureor el osiik aike el ousebech a bedengir. "Ng diak el kirir el mechiteterir a rengelekir me bol sengerenger, me a lechub e bol meuu" (Mosiah 4:14). A rechedam me a rechedil a kirir el smiik e kutmokl aike el ousbech a telungalek er a taem er a secher, kerior, diak loureor, me a lechub eng kuk di ngerang el ringel.

Alsekum a a chedam a diak el sebechel el smiik e kutmokl aike el ousbech a telungalek er ngii ea rebebil er a rechad er a rechad er a telungalek a diak el sebecherir el olngeseu, e ngii a sebechel olengit a ngesou er a roungerachel er a priesthood.

A rengalek a sebecherir el olngeseu el osiik aike el ousebech a telungalek el mo olngeseu er a rechedam me a rechedil el meruul a urerir, mo ungil ngalek er a skuul, mengetmokl a bilir me a klokliir, mengetmokl a bedengir me a blirir, a mo mesisiich a bedengir.

A rechad er a telungalek a kirir el merael mo meduch el menguiiu, e meluches, e meruul a beot el lochur e kirir el osiik a bekel techall el mesuub e melisiich a le meduch er ngii el tekoi. Ng kirir el mo oltirakl er a Llach el Kirel a Omelisiich er a Bedenged e mo mengang a ungil kall. Alsekum eng sebechel, ea telungalek a kirel mo kutmokl a kelel a tal rak, malechub eng sel sebecherir, er aikel meklou a belkul el kirel a omengang er a bekel sils. A rechad er a telungalek a kirir el mengeroid er tir er a diak e kmal belkul el blals, e mengersomel el kirel a ta er a klebesei, e mo meruul a rokui el ngerchelir, e mo ungil ousbech aike el ngar er ngii er tir, e diak el meterekakl.

A rechedam me a rechedil a kirir el olisechakl er a rengelekir el mo sebecherir el merous el mo er a rebebil er a rechad. A rebekel chad a sebecherir el odersii a kmo ngerang, a di lekekerei meng di ungil. A ta er a teletael el sebeched el olngeseu er a remechebuul a mo olsengerenger el tang er a tal buil

e mo melechang a uldars er a olsengerenger, el ngii a mo olngeseu el mo omekang er a resongerenger, omdor er a re diak a blirir, omekbail er a re meau, e mengelaod er a rechelbangel a ringel. Kede chotii a beltkil a rengud el mo er a Rubak sel dolngeseu er a rebebil er a rechad. Ngii a mla kmu el kmo, "Sel bla mrelii el mo er a ta er tirka el odam er kau, e ke mla rullii el mer ngak" (Mateus 25:40).

Omerk er a Ebangkelio



A Rubak, el lokuu a ruriul-klebese el profet, a mla olisechakl el kmo a rokui el chad er Ikelesia a ngar er ngii a ngerchelir el mo omerk er a ebangkelio el mo er a rebebil er a rechad. "Ng mo ngerchelel a rebekel chad el mo ouchais e omeklatk er a tonari er ngii" (D&C 88:81). A Alma el ngii a profet er a Babier er a Mormon a kmo, sel de metecholb eng kirel el mo mimokl el mo dechor el sioning er a Dios er a ngii dil taem, me a rokui el tekoii, me a ngii dil basio" (Mosiah 18:9).

A rechad er a telungalek a kirir el mo er sel tkul er bab el sebecherir el

olngeseu er a rechederir, sechelirir, me a tonari el mo medengelii a ebangkelio er a Jesus Kristo me a klengeltengat el bol ngai er a klengar er tir. Sel domerk er a ebangkelio, ea rechadam me a rechedil a mo smisiich a klaumerang er tir e mo ouchais a klengeltengat er a ebangkelio el mo er a rebebil er a rechad. A telungalek a sebechel el:

- Bo mungil el okesiu el mo oltirakl a rokui el llach (mesa Mateus 5:16).
- Bo dmeu a rengrir el chad er a Ikelesia (mesa Romans 1:16) e bo mouchais er a rebebil er a rechad el kmo kom chad er a ikelesia.
- Bo moker er a rechad el mkaodengei el kmo ng sorir el mo medengelii a Ikelesia
- Mo olengit a ngesou er a Rubak el mo ngiltii a telungalek me a lechub eng tal chad el ngii a ltmokl el mo orrenges er a ebangkelio.
- Bo mo chotii a Ikelesia el mo er tia el telungalek me a lechub eng chad lokuu a teletael, el mo olengit er tir el mo obengkemiu er a ongdibel er a telungalek me a lechub eng mo er a miting er a Ikelesia, e mo mesterir a babier er a ikelesia, me a lechub eng babier el longuiiu, me a lechub e bo mouchais er tir el kirel a klengeltengat er a ikelesi.
- Mo olengit er a telungalek me a lechub eng tal chad el mo mesuub el obengterir a re misionari.

A rechadam me a rechedil a ngar er ngii a ngerchelir el mengetmokl er a rengelekir el mo mui- el misionari. A

omengetmeklir a rengalek, oumesingd el ngalek el sechal, ea rechedam me a rechedil a kirir el olisechakl er a ebangkelio er a blai, mo er ngii a ome-suub el chedaol llechukl me a nglunguuch er a telungalek me a derstang el chad, e mengedecheduch er tir el kirel a ngerachel me a klengeltengat sel domerk er a ebangkelio.

Ruoll er a Templo el kirir a re Dirk Chad me a re mla Mad



Chelsel a templo, ea re klikiid el chad er a Ikelesia a ngmai a chedaol ruoll el mo soiseb er a telbiil lobengkel a Dios. Te dirrek el meruul a ruoll el kirir a re mla mad el chederir. Alsekum eng sebechel, ea chedam me a chedil a kirir el ngmai a bailengir el mo soiseb er a templo er tirke el oungerachel er a priesthood e mo er a templo el mo ngmai a klengeltengat el kirir. Alsekum eng diak el sebecherir el mo er a templo, eng kirir el mo klikiid el di mo nguu sel babilengir el kirel a mo soiseb er a templo.

A telungalek a ngar er ngii a chedaol ngerchelir el mo mesang el kmo a ureor er a templo a meketmokl el kirir tirke el mla mad el chederir el dimlak el ngai aika el ruoll. A rechad er a Ikelesia el tir a mla ngmai a ureor el kirir a mo blechoel el mo er a templo, sel lungil el temir, me a dirrek alsekum a templo a ngar er ngii er a bitar tir el mo meruul a ruoll el kirir a rechederir el mla mad.

A rechedam me a rechedil a kirir el mo mengudel a ngii dil record er a meklou a belkul el tekoi el mla duubech er a klengar tir me a klengar er a rengelekir, luldumukl a babier el olchotel a klengeltengat el blal ngai, techolb e chelid, me a bebil er a ruoll me a teletael, chebechiil, me a kodall; meklou a belkul el babier; siasing; me a babier el ngar er a nius, me a kuk di bebil el osisiu. Ng kirir el mo kutmeklii a kuk di reksi er tir e omeksemeriar er a rechad er a telungalek me te mo meluches a reksi er tir. Ng kirir el mo ngosuterir a remekereki el ngalek el mo omuchel er a reksi er tir.

A telungalek a kirir el mo osiik a tekoi el kirir a rechederir el mla mad e mo kutmeklii el mo reksi er a telungalek. Ng kirir el mo omuchel el mengetmokl er a reksi er tir el lomuchel el mo er a ongeuang el telcheroll.

Osisechakl el mo er a re Merreder



Ngultuil er a derreder er a re merreder er a stake, mission, me a district, ea roungerachel er a priesthood me tirke el merreder aike el telengtengil a ikelesia a mo olisechakl er a rechedam me a rechedil el mo medengei e meruul aike el kldei el ngerchelel a telungalek (mesa llel a babier 12–15). A remerreder a kirir el olisechakl er a rechedam me a rechedil el mo meduch el loungerachel a telungalek er tir. Alsekum ea telungalek a kiei er a cheroid el basio, ea merreder er a stake, mission, me a district a kirir el mo mesang el kmo a rechedam me a rechedil a suub e kutmokl a ngerchelir.

Teletelel Omengull er a Blai (Mo er a Telungalek el kiei er a Cheroid el Basio)



A bebil er a telungalek a kiei er a cheroid el basio meng diak el sebecherir el blechoel el mo er a ike el ward me a branch er tir. *Ngultuil er a kengei er a merreder er a stake, mission, me a district*, ea ikaikid el telungalek a kirir el ngar er omengull er a Sandei er a blirir. Aike el basio el diak a kltmocl el Ikelesia er ngii, ea telungalek a kirel nguu a kengei er a Area President.

A chedam me a lechub eng ta er a obang a priesthood el chad a sebechel kutmeklii e omekngeltengat er a sacrament alsekum eng klikiid, el ngii a prist er a Priesthood er a Aaron me a lechub eng obang a Priesthood er a Melhisedek, *e mla nguu a kengei er a oungerachel er a priesthood*. A ngii dil chad el obang a priesthood a sebechel

el mo merous er a sacrament. A omsodel a teletelel a oketmeklel a sacrament a ngar er a llel a babier 21–23 er tia el babier el olngeseu.

A omengull er a Sandei a kirel beot, e obang omengull, e klikiid. Ng sebechel uldimukl er ngii a:

1. Chelitakl er a uchelel
2. Nglunguuch er a uchelel
3. Omekngeltengat me a merous er a sakrament
4. Me a tang me a lechub eng betok er a ikakid:

- Chimong me a lechub eng teblong el mekekedeb el cheldechuduch me a lechub eng olchotel a klaumerang

- Omenguiu el chedaol llechukl me a omsodel er a telungalek
- Suobel el obang a ta er a rechad er a telungalek

5. Chelitakl el mo chosmerii

6. Nglunguuch el mo chosmerii

Sel dongetmokl el kirel a omengull er a Sandei, e a rechadam me a rechedil a kirir el mo oltirakl er a Chedaol Reng er a Rubak. "Me a ongdibel er tir a luleked . . . loltirakl a teletelel a urerel a Reng, me a klisiichel Edaol Reng; le klisiichel Edaol Reng a ulemekrael er tir a bo lolisechakl, me a lechub e blo lolisiich a reng, me a lechub e bo lolu-luuch, me a lechub e blololengit, me a lechub e blo longitakl, a ngii di le ngerang a milkedmokl." (Moroni 6:9).

A telungalek a kirel ousbech a chedaol llechukl el uايا lomekrael er tir. Osisiu, eng kirir el ousbech a cheldechaduch er a ika el meklou el ongdibel, *Gospel Fundamentals, Gospel Principles, True to the Faith, For the Strength of Youth*, babier er a re misionari, babier er a Ikelesia, me a kuk bebil er a babier el meketmokl er a Ikelesia me a rua siasing.

Alsekum eng diak a chad er a telungalek el obang a priesthood, ea chedam me a lechub eng chedil a sebechel mo mengdibel er a telungalek el mo dmak e mengitakl, mesuub a chedaol llechukl, meluluuch, e olekes er a deleuil er tir me a Chedam er a Babeluades. Ngkel loba priesthood el oungerachel er a telungalek a mo kutmeklii a taem eng mo sebechel a telungalek el blechoel el melai er a sakrament.

A rechadam me a rechedil a kirir el mo rullii meng ngar er ngii a omilil er tir er a bekel sandei, el uايا rua omilil er a oreomel, pikenik, ungil el movie, odingel el mo er a dekauchad el chad, klekool, chelitakl, me a omengedub.

A telungalek a kirel el mo melechang a ongeltacher, uldars er a olsengerenger, me a kuk bebil er a uldars el mo er tirke el tir a oungerachel el priesthood.

A telungalek a diak el bo lolecholt a ngii di llechukl el babier el mo er a Ikelesia, eng di ngkel priesthood el oungerachel a mo blechoel el oker a nger er a chedam, el olengit er ngii me louchais el kirel a telungalek er ngii. Alsekum eng klou a belkul, ea roungerachel a sebecherir el mo oker a ker er a chedam lokiu a dengua.

Ruoll er a Priesthood me a Klengeltengat



A ruoll er a priesthood a chedaol lomeruul el beskid a Rubak e meketmogl er tirke el loba ngerachel er a priesthood. A klengeltengat er a priesthood a sebeched el ngmai lokuu a ngerachel er a priesthood el lomekungil, menge-laod, e omeksemeriar. A rsechal el meruul aika le ruoll me a klengeltengat a kirir el mo kutmekelther el mo oltirakl a osisechakl er a ikelesia e melasem el mo ultuil er a Chedaol Reng. Ng kirir el mengetmogl aika el ruoll me a klengeltengat el klikiid a teletelir e oltirakl aikakid el teletael; aika el ruoll a kirel:

1. Mo meruul el loba ngklel a Jesus Kristo.
2. Mo meruul el lultuil er a ngerachel er a priesthood.

3. Mo meruul el oltirakl aike el kirel teletelel, el uaia usbechellel a derstang el tekoi me a lechub eng usbechelel a cheledaol cheluch.
4. Ngultuill er a derreder er a mla moterekokl el oungerachel er a priesthood el ngii obang sel kiis, alsekum eng kirel.

A ruoll el kirel ngeiuul a kengei er a oungerachel er a priesthood a uaia omn-gakl e omekngeltengat er a rengalek, mengetmogl a techolb e cheliid me a oterkeklel a chad, melai er a priesthood me a olterekokl er a chad el mo er a obis er a priesthood, omekngeltengat e merous er a sakrament, me a oterkeklel a debull.

Alssekum e te betok el sechal a mengetmogl er a ruoll me a lechub eng klengeltengat, ea derstang er tir a nguu a

katur a chimal el moer a bebul a ongel-
ngelel a chad el ngar er a katur. Ng
diak el sal lungil a molai er a kmal
betok el chad el obang a priesthood
el mo meruul er tia lomeruul.

A ruoll me a klengeltengat el mla
mesaod er tia el bliongel a mo ngosu-
terir a rechedam el mo btelul a telun-
galek er tir.

Omngakl me a Omekngeltengat er a Rengalek



“A rebekel chad er a Ikelesia er a Jesus
Kristo el ngar er ngii a rengelekir a mo
ngoiteterir a rengelekir el mo er a
medal a Ikelesia, el mo er a re elders,
me te mo ngmai a chimorir el locha er
a bebul a btelrir lokuu a ngklel a Jesus
Kristo e mo omekngeltengat er tir er a
ngklel a Osobel. (Mesa D&C 20:70).”
Olchotel a klemerang er a ocholt, eng
di tirke el klikiid el sechal el obang a
Priesthood er a Melhisedek a sebe-
cherir el mo mengetmokl er a omngakl
me a omekngeltengat er a rengalek. A
ruoll el omngakl e omekngeltengat er a

*rengalek a kirel ngeiuull a kengei er tirke el
ngarbab el merreder.*

Sel bo el omekngeltengat er a tolehou,
e tirke el sechal el lobang a Priesthood
er a Melhisedek a mo dechor el iliuekl
e orkedii a tolechoi er a chimorir. Sel
bo el omekngeltengat er a klou el
ngalek, e tirka el sechal a mo ngmai a
chimorir el lochang er a bebul a btelul
a ngalek. Ea chad el ngii a mo omekn-
geltengat a mo:

1. Mekedongii a Chedam er a
Babeluades.
2. Mo meketeklii el kmo a klengel-
tengat a meruul el lultuil er a nger-
achel me a kliiich er a Priesthood
er a Melhisedek.
3. Mo msang a ngklel a ngalek.
4. Mo kmung a klengeltengat er a
priesthood el lultuil er a Chedaol
Reng.
5. Mo chosmerii lobang a ngklel a
Jesus Kristo.



Techolb e Chelid

*Ngar cheungel a derreder e rengkel kot el
oungerachel, ea klikiid el priest me a
lechub eng klou el chad el obang a*

Priesthood er a Melhisedek a sebechel el mo meruul er a techolb e chelid. Sel bo el loruul er ngii, e ng mo:

1. Mo dechor er a chelsel a ralm ngii me ngkal chad el mo metecholb.
2. Sel lungil teletael meng diak a tele-mall el duubech, eng mo nguu a klitechetul a chimal el lorkedii a klischel a chimal ngkal chad; e ngkal chad el mo metecholb a orkedii a klitechetul a chimal ngkal chad el meruul er a techolb el lobang a klitechetul a chimal.
3. Mo odersii a chimal el mo er bab.
4. Mo dulii sel cherrungel el ngklel ngika el chad el kmo, “Ak mla modurech er a Jesus Kristo, e ak mo melecholb er kau el lobang a ngklel a Chedam, me a Ngalek, me a Chedaol Reng, Amen” (D&C 20: 73).
5. Ngkal chad el mo metecholb a mo orkedii a iisngel meng diak el mechesurs; e ngkal chad el meruul er a techolb a mo nguu a kadekmelel a chimal el lorkedii a ulkel ngikal el chad e mo odelbii el rokir er a ralm, me a ika el bilel ngika el chad meng di mo modulb.
6. Mo ngoseuir ngika el chad el mo dechor.

A terung el prist me a lechub e te chad el obang a Priesthood er a Melkisedek a mo sioning a bekel techolb el mo mesang el kmo ng mo ungil meket-mokl. Tia el techolb e chelid a kirel mo lmuut el mo belekel alsekum a tekoi er a chelsel a diak el oltirakl aike el ngar er a chelsel a Osisechakl me a

Telbiil 20:73 me a lechub ea telkib er a bedengel me a lechub eng bilel ngika el chad a dimlak el modulb el rokir. A chad el mo metecholb me a chad el meruul er a techolb a kirir el oubail a becheleleu el bail el ngii a diak el sal meliiliut sel bo el dekimes.

Omengedaol



A rechad el mla obult el tir a etiu a rekrir me a lechub e te meklou me tirke el eiai a rekrir el chad er a blirir a di diul chad er a ikelesia a mo mechedaol er a temel a miting er a sacrament (mesa D&C 20:41). A rengalek el eiai a rekrir a sebecherir el mo mechedaol ruriul er a techolb e chelid er sel basio el ngar er ngii a techolb el ngii a kesengil eng tang el chad er a bliil a chad er a lkelesia ea chedam me a chedil a mla kongei er a techolb me a omengedaol. *Ngar cheungel a derreder er a bisop me a lechub eng merreder er a branch, ea chimong me a lechub e te betok el sechal*

el obang a Priesthood er a Melhisedek a mo meruul er tia el ruoll. Te mo ngmai a chimorir el lochang er a btelul a chad. E ngkel meruul er tia el ruoll a mo:

1. Dulii sel cherrungel el ngklel a chad.
2. Mo meketeklii el kmo tia el ruoll a meruul lultuil er a ngerachel me a klisiich er a Priesthood er a Melkisedek.
3. Mo chemedolii e oterkeklii a chad el mo chad er a Ikelesia er a Jesus Kristo er a Uriul-klabesei el Santo.
4. Mo msang a sengk er a Chedaol Reng el mo kmu el kmo, “Mnguu a Chedaol Reng.”
5. Mo msang a klengeltengat er a priesthood el lultuil er a Chedaol Reng.
6. Mo chosmerii el lobang a ngklel a Jesus Kristo.

Ngeiul a Priesthood me a Omengedaol el mo er a Obis er a Priesthood

A bisop me a lechub eng merreder er a branch a oungerachel el lomes er a teletelel a ngeiul a Priesthood er a Aaron me a omengedaol el mo er a obis er a deacon, sensei, me a prist. A uchei er a lemechedaol a chad el moer a obis er a Priesthood er a Aaron, eng kirel mo onger a ker el mo loker ngii a bisop me a lechub eng merreder er a branch e kirel mo klikiid. Ng dirrek, el kirel bo el kengei er ngii a rechad er sel temel a miting er a sacrament. Ngultuil er a kengei er a bisop me a lechub eng

merreder er a branch, ea prist a sebechel el mo msang a ta er a rechad a Priesthood er a Aaron e chemedolii el mo er a obis er a Priesthood er a Aaron.



A merreder er a stake me a lechub eng mission a kirel mo mesang a ngeiul a Priesthood er a Melkisedek me a omengedaol el mo er a obis er a elder me a ngarbab el prist.

Sel bo momsang a priesthood me a lechub e ke mengedaol er a chad el mo er a obis er a priesthood, ea chimong me a lechub eng betok el sechal a mo orkedii a chad el ngii a mla moterekokl e rengkel ngarbab el oungerachel a mo ngmai a chimorir el lochang er a btelul ngika el chad. E ngkel chad el meruul er tia el ruoll a mo:

1. Mekedongii sel cherrungel el ngklel a chad.
2. Mo dulii sel ngerachel me a klisiich (Ng Priesthood er a Aaron me a lechub eng Melkisedek) el lokuu ngii a meruul er tia el omengedaol.
3. Mo msang a Priesthood er a Aaron me a lechub eng Melkisedek, a le dirkak el mengai ruhei.

4. Mo chemedolii a chad el mo er a obis er a Priesthood er a Aaron me a lechub eng Melkisedek e mo msang sel llemalt, klsiich, me a ngerachel er sel obis.
5. Mo msang a klengeltengat er a priesthood el lultuil er a Chedaol Reng.
6. Mo chosmerii el lobang Ngklel a Jesus Kristo.

Sakrament



A sacrament a kmal chedaol ruoll. Omeleiu a sakrament a meskid a techall el mo melbedebek er a klengar, osischeklel, me a Tngakireng er a Jesus Kristo. Ng taem el domekbeches a telbiil el miruul lobengkel a Rubak er a temel a techolb e chelid (mesa Mosiah 18: 8–10).

A resensei me a re prist a sebecherir el mengetmokl er a sakrament; a prist a sebechel lomekngeltengat er ngii; ea deacon me a sensei, me a prist a sebecherir el merous er ngii. Tirke el sechal el obang a Priesthood er a Melkisedek a sebecherir el mengetmokl, omekngeltengat, e merous er a sakrament eng di tiang a mo uaisei sel sekum te ngar er

ngii a di mekesai el sechal el obang a Priesthood er a Aaron. Asekum a chad a mla tomellii a klou el tellemall, eng diak el kirel mengetmokl, omekngeltengat, me a lechub eng merous er a sacrament el di merekmo a bla lolengit a klausubes e mla sumeckeklii a teletael ngii me a bisop me a lechub eng merreder er a branch.

Tirke el mengetmokl, omekngeltengat, me a merous er a sacrament a kirir el mengetmokl er tia el ruoll el kirir a rebekel chad el uaia lomtechei er a Rubak. A derstang er tir el obang a priethood a kirir el meruul er tial el teletael el lobang omengull, me a blekongesenges el lomeruul. Ng kirir el mo ungil kltmokl, beches, e ungil loubail. A teletelir a kirel ochotii a el kmo ng chedaol tia el ruoll el loruul er ngii.

Tirke el sechal el mengetmokl er a sacrament a kirir el kutmeklii ruchei er a lomuchel a miting. Te di lochang a mecherrungel el blauang er a ikel blil a blauang me a beches el ralm el ngar er a chelsel aike el blil a ralm er a sacrament e ngmai el lochang er a bebul a tebel er a sakrament. Te mo dokedek aika el blauang me a ralm, lobang a becheleleu el mamed.

Sel temel a chelitakl er a sakrament, e tirke el dengchokl er a tebel er a sacrament a mo nguu a dekedekel aika el blil a blauang me a ralm e mo melebtib aika el blauang el mo mekekeri. Sel bol merek a chelitakl, e ngkel chad el mo omekngeltengat er a blauang a mo outubaruach e mo dului sel nglunguuch er a sakrament

el kirel a blauang. E tirka el sechal a mo merous el mo er a rokui el chad el lungil a blechebechel me a teletelel. Ngkel ngar bab el oungerachel er tia el miting a me a kot el nguu a sakrament. Sel bol merek a rebekel chad el melai er a sakrament, e tirke el merous er ngii a lmuut el mo er sel tebel er a sacrament. Tirke el lomekngeltengat er a sakrament a lmuut el mo dokedek aika el bliil a sakrament sel bla bol merek.

Tirke el ngar er a tebel er a sakrament a kuk mo nguu a dekedekel a bliil a ralm. E ngkel chad el lomekngeltengat er a ralm a mo outubaruach e mo dulii sel nglunguuch er a sacrament el kirel a ralm. E tirke el sechal a mo merous el mo er a rokui el chad. Sel bol merek ea ika el bliil a ralm a lmuut el mo er a tebel e medekedek. E tirke el rokui el sechal el lumekngeltengat e merous er a sakrament a mo dengchokl er a kingellir el teloi er a rebekel chad.

A sakrament a mo er a rechad er a Ikelesia, el uldimukl er a rengalek. A chad el oungerachel er a miting a diak el louchais el kmo a sakrament a kmal do mo er a rechad er a ikelesia; ng diak el kired el tomer er a re diak el chad er a ikelesia el melai er a sakrament.

A nglunguuch er a sacrament a kirel kmal mo bleketakl, e kmal losisiu, e kliikiid. Alsekum a chad el lomekngeltengat er a sacrament a dulii el mo ngodech e diak el rellii el mo ungil, e a bisop me a lechub eng merreder er a branch a kirel el mo olengit er ngii meng lemuut el mo omelekel er a nglunguuch el mo dulii el mo ungil.

A nglunguuch er a blauang a ua tiakid:

“Kau el Dios, el Diak a Ulebengelel Chedam, a ki olengit er kau el obang a ngklel a Ngelekem, el Jeus Kristo, el mo omekngeltengat e mchedolii tia el blauang el mo er tirke el rokui el chad el mo melai er ngii, me bol nguu e mo lolbedebek er a bedengel a Ngelekem, e bol sioning el lekor kau, Kau el Dios, el Diak a Ulebengelel Chedam, me bol mimokl el mo obang a ngklel a Ngelekem, el bo el blechoel el melbedebek er ngii e bo el oltirakl a llechul el blal besteriri, me bol blechoel a Chedaol Reng er ngii bo lobengterir. Amen” (D&C 20:77 me a Moroni 4)

A nglunguuch er a ralm a ua tiakid:

“Kau el Dios, el Diak a Ulebengelel el Chedam, a ki olengit er kau el obang a ngkel a Ngelekem, el Jesus Kristo, el mo omekngeltangat e mchedolii tia el [ralm] el mo er tirke rokui el chad el mo melim er ngii, me bo lolim er ngii e bo lolbedebek er a rsechel a Ngelekem, el milchubel el kirir; me bol sioning el lekor kau, Kau el Dios, el Diak a Ulebengelel el Chedam, me bol blechoel el melbedebek er ngii, me a Chedaol Reng er ngii bo lobengterir. Amen” (D&C 20:79 me a Moroni 5).

A sakrament a kirel mereched el meketmokl el mo cheroid er a bebul a tebel sel bol merek a miting. A derengel a blauang el mlo medechel a sebechel mekang.

A omekngeltengat me a omerusel a sakrament a ngeiull a kengei er a ngarbab el oungerachel el chad.

Omengedaol er a Cheluch

A ta er a chad (sebechel betok) el ngii a obang a Priesthood er a Melkisedek a mo che,edolii a klikiid el cheluch er a olive el kirel a cheledaol el urerel el mo omekungil er a rsmecher me a rechelbangel a ringel. Ngkle cha del mo mengedaol er a cheluch a mo:

1. Orkedii a diak el delanged el blil a cheluch el ngar er ngii a cheluch er a olive
2. Mo mekedongii a ngklel a Chedam er a Babeluades.
3. Mo meketeklii el kmo ng meruul er tia el teletael el lokuu a ngerachel me a klisiich er a Priesthood er a Melkisedek.
4. Mo chemedolii a cheluch (ng diak el tia el blil) e mo oterkeklii el mo omekungil e melisiich er a rsmecher me a rechelbangel a ringel.
5. Mo chosmerii el loba ngklel a Jesus Kristo.

Omengetmokl el mo er a Rsmecher

Ng di tirke el sechal el obang a Priesthood er a Melkisedek a mo mengetmokl er a rsmecher me a rechelbangel a ringel. Ngoumesingd, el terung me a lechub eng betok el chad a mo dmak e mengetmokl, eng di chimong a dirrek el sebechel el di ngii el tang e meruul er ngii. Alsekum eng diak a mla mechedaol el cheluch, ea chad el obang a Priesthood er a

Melkisedek a sebechel el mo msang a klengeltengat lultiul er a ngerachel me a klisiich er a priesthood.



A chedam el obang a Priesthood er a Melkisedek a kirel el mo mengetmokl er a rsmecher el chad er a telungalek er ngii. Ng sebechel el olengit er a ta er a sechal el dirrek el obang a Priesthood er a Melkisedek el mo ngoseuir.

A omengetmokl el mo er a rsmecher el chad a cherul bedengel: (1) mo kutmeklii el obang a cheluch e mo (2) rongedii sel omengetmokl.

Mengilt el obang a Cheluch

A tal chad el obang a Priesthood er a Melkisedek a mo nguu a cheluch el chiltii a chad el smecher. Sel bo loruul er ngii, eng mo:

1. Locha sesei er a cheledaol cheluch er a btelul a chad.
2. Mo ngmai a chimal el locha er a btelul a chad e mo mekedongii sel cherrungel el ngklel a chad.

3. Mo meketeklii el kmo ng mengilt er ngika el chad el lokuu a ngerachel me a klisiich er a Priesthood er a Melkisedek.
4. Mo meketeklii el kmo ng mengilt el lobang a cheluch el ngii a mla mechedaol el cheluch el kirel mo omekngeltengat er a chad el smecher me a chelbangel a ringel.
5. Mo chosmerii el obang a ngklel a Jesus Kristo.

Mo Rongedii tia el Omengilt

Ngoumesingd, el terung me a lechub eng betok el chad el obang a Priesthood er a Melkisedek a mo ngmai a chimorir el locha er a btelul a chad el smecher. A ta er tirka el chad a mo rongedii tia el omengilt. Sel bo loruul er ngii, eng mo:

1. Mekodongii a chad er sel cherrungel el ngklel
2. Mo meketeklii el kmo ng mo merenged er tia el omengilt lultuill er a ngerachel me a klisiich er a Priesthood er a Melkisedek.
3. Mo msang a klengeltengat lultuil er a Chedaol Reng.
4. Mo chosmerii el obang a ngklel a Jesus Kristo.

Klengeltengat er a Chedam me a Kuk di bebil er a Klengeltengat el Mengelaod a Reng e Olisechakl



A klengeltengat er a chedam me a kuk di bebil er a klengeltengat er a priesthood el meskid a ngesou e cholodid sel doltirakl er a Chedaol Reng.

A chedam el obang a Priesthood er a Melkisedek a sebechel el mesterir a rengelekel a klengeltengat er a chedam. Aikaikid el klengeltengat a kmal klou a belkul sel loraol a ngalek el mo cheroid er a blai, el uaia mo er a skuul me a lechub eng mo er a mission, me a lechub e tomuchel er a ureor, chebechiil, mo er a klsoldau, me a lechub e te kuk di mo chelbangel a meringel el ringel er a klechad. Aikaikid el klengeltengat a kmal smisichii a telungalek. A telungalek a sebechel el mo lmuches aikel klengeltengat er a chedam el mo er a record er a telungalek, eng di ng diak el bol rekord er a Ikelesia. A rechedam me a rechedil a kirir el melekoi er a rengelekir me te mo osiik a klengeltengat er a chedam sel bo el usbechall.

Tirke el klikiid el sechal el obang a Priesthood er a Melkisedek a dirrek el sebecherir el mesterir a klengeltengat el mo mengelaod e olisechakl er a rebecherir, bebil er a rechad er a telungalek, me a kuk di bebil er a rechad el mo olengit er tir.

Sel bo lomesterir a klengeltengat er a chedam me a lechub eng kuk di bebil er a klengeltengat me a osisechakl, ea chad el ngii obang a Priesthood er a Melkisedek, el sebechel di ngii el tang me a lechub eng ngobengkel a ta er a klikiid el chad el dirrek el obang a Priesthood er a Melkisedek, a mo ngmai a chimal el locha er a btelul a chad el melai er a tia el klengeltengat. Ng diak a belkul el ousbech er a cheluch er tiaikid el klengeltengat. Ng kel mo melekoi er a klengeltengat a mo:

1. Mekedongii sel cherrungel el ngklel a chad.
2. Mo meketeklii el kmo ngomsang tia el klengeltengat el lultuil er a ngerachel me a klisiich er a Priesthood er a Melkisedek.
3. Mo msang a chad a klengeltengat el lultuil er a Chedaol Reng.
4. Mo chosmerii el obang a ngklel a Jesus Kristo.

Oterkekkel a Debull

A chad el mo olterekokl er a debull a kirel el obang a Priesthood er a Melkisedek e kirel el mla *nguu a kengei er a merreder er a priesthood el ngii a oungerachel er tia el teletael.*

Sel bo lolterekokl er a debull, eng mo:

1. Mekedongii a Chedam er a Babeluades.
2. Mo meketeklii el kmo ng mo olterekokl er a debull el lultuil er a ngerachel me a klisiich er a Priesthood er a Melkisedek.
3. Mo oterkeklii e chemedolii tia el basio el bo el delakel chad er ngii el mo ulengull el basio er a chad el mla mad.
4. A di lungil besul, e bo loluluuch me tia el basio bol cheledaol el mekereomel el mo lmuut er sel Okiis er aKodall.
5. Mo olengit er a Rubak me bo longelaod er a telungalek er ngika el chad e dirrek el sebechel kmu sesei el tekoi el lultuil er a Chedaol Reng.
6. Mo chosmerii el obang ngklel a Jesus Kristo.

Alsekum e tia el telungalek a di ungil er a rengrir, ea chad (el kmal lungil a lechad el obang a Priesthood er a Melkisedek) a bol delii a nglunguuch el kirel tial el basio el delekull er ngii a chad e bai diak el loluluuch el oldars e lolterekokl er a mla mad el chad.

Omeleiu! a Babier er a Ikelesia me a Skel a Tekoi el kirel a Reksi er a Telungalek

Tirke el merreder er a ikel basio el lengar ngii a sebecherir el ngmai a klalou me a klekedall er a Ikelesia, el uldimukl er ngii a chedaol llechukl, teletelel a suobel, babier er a Ikelesia, karment, me a bail er a mo er a templo, er a ikel basio er a Ikelesia el ngii a oungerachel el oltobed aikaikid, me a lechub eng Salt Lake Distribution Center, me a lechub eng Internet er a Ikelesia, el ngii a www.lds.org.

A tekoi el kirel a reksi er a telungalek a sebeched el ngmai er sel Internet er a reksi er a telungalek er a Ikelesia, el ngii a www.familysearch.org.

IKELESIA ER A
JESUS KRISTO
ER A URIUL-KLEBESEI
EL SANTO

